

TUTÚ DÍHNA NUU NĚ CADÚHA TÉ PÈLÚ

Té Pèlú cádũha-dé tutú sá cúú-xí cuè ñáyiú sàndáá iní ñáhá xì Yá Ndiõxí

¹ Yúhú té Pèlú ní tendaha ñàha Xítóhó Jesucristú xícá cùu-í càháⁿ-í tnúhu-gá, te cádúha-í tutú-a sá cúú-xí nchòhó ñáyiú xínchíté nuu ndècu distritú Pòntó, ndìhi distritú Gàlaciá, ndìhi distritú Capadociá, ndìhi distritú Àsiá, ndìhi distritú Bìtiniá.

² Chi Dútú Ndiõxí ní cachí-gá sá cúú-ndó dèhe-gá ndéé cúnàhá vátá ngăva-gá ñuyíú, te Espiritú-gá ní quide-xi ndècu yíñuhu-ndo núú-gă vitna. Te ní cachí-gá sá cúú-ndó dèhe-gá cuèndá tni-ndo nchàa tnúhu càháⁿ Xítóhó Jesucristú, ndìhi cuèndá nduu ndoo nduu nine iní-ndó, chi ñu cuèndá-án ñí xíhí Xítóhó Jesucristú. Te xicáⁿ táhù-í núú Yá Ndiõxí sá ïo na chìndee chitúu ñaha-gă xii-ndo cuèi vitna te cuèi núú cuàháⁿ núú vèxi, te ñu-ni-gá ná cádá te ïo váha cuu iní-ndó cùndecu-ndo.

Tnúhu ndee iní sá ndécú ndìhi ñáyiú sàndáá iní ñáhá xì Yá Ndiõxí

³ Te vitna chí ná càchí-ó sã ïo càhnu cuu Yá Ndiõxí Yaá cúú Tátá Xítóhó Jesucristú, chí ñu-gá ïo ní cundàhú iní ñáhá-gă xii-o ñu xíáⁿ ní quide-gá sá nchóó ñí nduu-o dàtná ñí ñáyiú saa vitna. Te ducaⁿ ñí quide ñaha-gă xii-o cuèndá sá Xítóhó Jesucristú ní xíhí-gá te ní ndoto-gá. Te cuèndá sá ñí nduu-o dàtná ñí ñáyiú saa, xíáⁿ ní ngúndecu ndìhi-o tnúhu ndee iní ⁴ sá cùndècu ndìhi-o-gá ñí caa ñí quíhíⁿ, chí

ducaⁿ ñi cachí-gá cunduu. Te yàcáⁿ vá quìní-gá-ó ñi ñⁿ sá cuèhé sá dúhá, te ío cudíí ìní-ó cùndecu-ò ndihí-gá ñi caa ñi quíhíⁿ. ⁵ Te sá sàndáá ìní-ó Yă Ndiöxí, núu xiăⁿ coto ñaha-gă xii-ò ndèé ná sàá nduu nàqueheⁿ cuendá ñáhá-gă chi ío càhnu cuu-gá.

⁶ Te xiăⁿ ío cudíí ìní-ndó ndècu-ndo, te cuèi nándi ndòho-ndo ndecu-ndo dico sacú-ñi nduu ducaⁿ ndòho-ndo. ⁷ Te òré ná cáda càhnu ìní-ndó yăha-ndo nchàa sá ná càda ñaha ñáyiu xii-ndo, te ducaⁿ te cutnùní sàndáá ndisa ìní-ndó Yă Ndiöxí, te sá dúcáⁿ sàndáá ìní-ndó Yă Ndiöxí ío-gá váha dàcúúxí dǐhúⁿ cuááⁿ chi xiăⁿ ñá túú cudíi-xi. Te cuèi ducaⁿ dico xito ndeé nàhí-ñi-güedé núu ndisa cùu-xi dǐhúⁿ cuááⁿ. Te ducaⁿ sǎtnahá-xi cùu nchohó cuendá nchaa sá ndòhó-ndó, te na sàá nduu quixi tucu Xítóhó Jesucristú te cúñaha-gă xii-ndo: “Ío váha ní quide-ndo, te vitna ío càhnu cuu-ndo, te tàú-ndó núcúndecu váha-ndo”, duha cúñaha-gă xii-ndo.

⁸ Te vitna ío cùu ìní-ndó Xítóhó Jesucristú cuèi vátá quìní-gá-ndó-gă, te ducaⁿ ño sàndáá ìní-ndó-gă, te ío cudíí ìní-ndó te súúní ñi ñá cùtnùní ìní-ndó ñasa cunduu tnúhu cáháⁿ-ndó sá dúcáⁿ ño cudíí ìní-ndó ⁹ cuendá sá ñi naníhí tàhú-ndó, chi ñi sàndáá ìní-ndó-gă.

¹⁰ Te cue téé ní xóo cáháⁿ tnúhu Yă Ndiöxí ndeé sanaha ñi cachí-güedé nàcuáa cada-gá cundàhú ìní ñáhá-gă xii-ò vitna. Te cue téé-áⁿ ño váha ní dácuáhá-güedé nàcuáa cada Yă Ndiöxí dàcácu ñihnu ñaha-gă xii-ò vitna. ¹¹ Te Espíritú Xítóhó Jesucristú ñi ngúndecu ndihí cue téé-áⁿ ñi xáhaⁿ-xi xì-güedé nàcuáa ndoho-gá, te ní xáhaⁿ tùcu-xi

xii-güedé sá sätá ná yăha ndoho-gá te ío cunuu-gă ndîhi Yá Ndiöxí. Te ío ní sani iní-güedé nŭu ná nduu sǎa ducaⁿ càda-xi, ndîhi nchaa nándi-gá cúú sǎ cáda-xí. ¹² Te Yá Ndiöxí ní xáhaⁿ-gă xii-güedé sá ncháá tnŭhu váha càháⁿ-güedé vá cúú-xí cuendá mée-güedě, chi cuendá nchoo cuè ñáyiú ndècu ñuyíú-a vitna cùu-xi. Te diu-ni tnúhu-áⁿ cúú tnŭhu càháⁿ nchúhú cue tée càháⁿ tnúhu Yá Ndiöxí núú-ndó. Te Espíritú sá ñí taxi Yá Ndiöxí ndécú ndîhi-o chindee ñaha-xi xii-ndí càháⁿ-ndí tnúhu-gá. Te cue espíritú xínú cuèchi núú Yă Ndiöxí ío cuení-xi quiní ndáá-xi nchaa nàcuáa cuáháⁿ tnúhu-áⁿ.

Yá Ndiöxí càchí-gá sá cáda-ó mée-ni sá văha

¹³ Te sá dúcáⁿ ío váha ní quide ñaha Yă Ndiöxí xii-ndo xǎⁿ xíní ñŭhu-xi ío váha cuáha-ndo cuendá nàcuáa cundecu-ndo te vá cání iní-ndó càda-ndo ni ñⁿ sá cuèhé sá dúhá, te ío quindáá iní-ndó sǎ Yă Ndiöxí cada váha ñaha-gă nduu na quixi tucu Xítoho Jesucristú. ¹⁴ Te ío tñi-ndo nchàa tnúhu càháⁿ Yă Ndiöxí, te vá cúhúⁿ-gă iní-ndó nándi sá cuèhé sá dúhá sǎ ñí xúhuⁿ iní-ndó cŭtnàhá vátá cundecu-gá-ndó ìchi-gá te ni vǎ cáda-ndó. ¹⁵ Te cada-ndo mée-ni sá văha cundecu-ndo dàtná quidé mée Yá Ndiöxí Yaá ní cáháⁿ ñáhá xii-o cundecu-ndîhi-gá. ¹⁶ Te càchí-gá núú tùtú-gá: “Cada-ndo mée-ni sá văha cundecu-ndo, chi ducaⁿ quide yúhú”, duha càchí-gá núú tùtú-gá.

¹⁷ Te Yá Ndiöxí cada ndáá-gá cuèchi nchaa ñáyiú, te vá cáda cuendá-gá cuèi nái ñáyiú cùú-yu, te nchòhó càchí-ndó sǎ díú Tătá-ndó cùu-gá te ndáá, núú xǎⁿ xíní ñŭhu-xi canehe-ndo sá yíñŭhu núú-gă ndi nchàa nduu cundecu-ndo ñuyíú-a. ¹⁸ Te diu-gá

ní dácăcu nihnu ñaha-gă xii-ndo ìⁿ ichi sá ñà túú nàndíhi ní sanu ichi ñaha cuè ñaní tnáhá-ndó nǐ xindecu ndéé sanaha ni cùu, te nchòhó sa nàha-ndo sá sǎ dúcáⁿ nǐ quide ñaha Yá Ndiöxí ní dácăcu nihnu ñaha-gă xii-ndo ìchi-áⁿ ñà túú ní chăhu-gá ni ìⁿ díhúⁿ cuááⁿ, te ni ìⁿ díhúⁿ cuixíⁿ sá ndíhí nihnu ñuyíú-a cuendá-ndó. ¹⁹ Chi Xítóhó Jesucristú ní quixi-gá ní sati níñí-gă, te ní xíhí-gá núú cùrúxí cuendá sá nchóó nàníhí tǎhú-ó, te cùu-gá dàtná ìⁿ mběé quiti ío váha iní-xi, quiti cãndoo canine. ²⁰ Te ducaⁿ nǐ ndoho Xítóhó Jesucristú, chi ducaⁿ tnàhí ndéé tnuní ndoho-gá ndéé cùtnàhá vátá ngăva-gá ñuyíú. Te ducaⁿ nǐ yáha-gá cùtnàhá ní quixi-gá òré vitna cùmání sǎá nduu nàa ñuyíú-a cuendá nchoo cùu-xi sá vǎha xii-o vitna. ²¹ Te nchòhó sa nihí-ndó tnùhu nàcuáa ní yáha Xítóhó Jesucristú cùtnàhá ní quixi-gá ñuyíú-a, núu xǎⁿ sàndáá iní-ndó Yá Ndiöxí. Te Yá Ndiöxí ní dándótó-gă Xítóhó Jesucristú, te sátá nǐ dándótó ñàha-gá te ní cachí-gá sá ïo cǎhnu cuu Xítóhó Jesucristú. Te sá dúcáⁿ nǐ cuu, xǎⁿ ío sàndáá iní-ndó Yá Ndiöxí, te ní taxi-gá tnúhu ndee ìní ndécú ndíhi-ndo sá sǎá nduu cùndecu-ndo ndíhi-gá ni caa ni quíhíⁿ.

²² Te Espíritú Yá Ndiöxí ní quide-xi te ní sándáá iní-ndó tnùhu-gá, te xǎⁿ ní nduu ndoo ní nduu nine iní-ndó, te cùu iní tnáhá ndisa-ndo nacuáa ndècu-ndo ichi Yá Ndiöxí, te xìni ñuhu ndisa-xi sá ïo ni yùhu ni iní-ndó cùu iní tnáhá-ndó ìⁿ ìⁿ-ndo. ²³ Te nchòhó ní nduu-ndo dàtná ìⁿ ñáyiu saa sá cuendá tnúhu Yá Ndiöxí, te tnúhu-áⁿ candeca-xi iní-ndó nǐ caa ni quíhíⁿ, te vá ìⁿ ndùu ndíhi nihnu-xi, te ñá díú cuendá ñáyiu ñuyíú-a ni ndùu-ndo ìⁿ ñáyiu saa

chi cuendá tnúhu-gá. ²⁴ Chi núú tùtú Yă Ndiöxí cächí-xi:

Nchaa ñáyiú ndècu ñuyíú-a cùú-yu dàtná cùhú, chi cùhú-ăⁿ tnaa-ni cùdí-xi te xihí-xi, ducaⁿ sãtnahá-xi cùú-yu.

Te nchaa sá ndécú ndìhí-yu cùu-xi datná ìⁿ itá cùhú-ăⁿ, chi itá-áⁿ tnaa-ni tucu cùdí-xi te ndàhvá-xi, ducaⁿ sãtnahá-xi cùu nchaa sá ndécú ndìhí-yu.

²⁵ Dico tnúhu Yă Ndiöxí chi vá náá tnàhí-xi, chi duha-ni ndècu-xi, te ñiú-ni duha cundecu-xi ni caa ni quíhíⁿ.

Duha cächí-xi núú tùtú-gá. Te ñiú tnúhu-áⁿ ñí dãnèhé ñáhá nchũhú cue téé cãháⁿ tnúhu Yă Ndiöxí xii-ndo.

2

¹ Te xíăⁿ xíní ñùhu-xi dañá-ndo nchaa núú sã cuèhé sá dúhá, te dañá-ndo ìchi tnúhu ndehnde, te dañá-ndo vã dándàhú-gá-ndó mèe-ndo sá quidé vãhá-ndo, te dañá-ndo ìchi cuedú ínì, te dañá-ndo nchàa tnúhu yiti. ² Te cada-ndo cuendá sá cùú-ndó dàtná cue landú yíquíⁿ vîtna sadi camá, chi landú-áⁿ mee-ni sàdi-güexi te sãhnu-güexi. Te cada ínì-ndó sã dúcáⁿ càda-ndo chi xìni ñuhu-xi sá ïo cuhuⁿ ínì-ndó dàcuaha-ndo tnúhu Yă Ndiöxí, chi xíăⁿ cùú-xí mèe-ni tnúhu váhá, te ducaⁿ te cuita cuehnu nihnu-ndo ìchi-gá quíhíⁿ ndéé ná sàá nduu cùndecu-ndo núú ndécú-gá. ³ Te ducaⁿ xìni ñuhu-xi cada-ndo, chi nchòhó sa ní cutnùnì ndisa ínì-ndó sã Yă Ndiöxí ïo váhá ínì-gá.

Xítohó Jesucristú cùú-gã dàtná ìⁿ yúú

⁴ Te ío nanducu ñihnu-ni-ndo Xítohó Jesucrìstú Yaá quidé nàcuáa naníhí tǎhú-ó. Te diu-gá ní cuu-gá dàtná ìⁿ yúú sǎ ñà túú nàndihì sá cúú-xí ñǎyiu ñuyíú-a, chi ní dáquéé tǐhú ñáhǎ-yu xii-gá. Dico Yá Ndiǒxí ní cachí-gá sá Xítohó Jesucrìstú cúú-gǎ dàtná ìⁿ yúú sǎ ïo-gá váha, chi ío cùnuu-gá. ⁵ Te nchòhó sa ní naníhí tǎhú-ndó, te ío-gá chí nándücu nihnu Yá Ndiǒxí cuendá cuu ìⁿnuu-ndo cùndecu-ndo ndihì Espíritú-gá. Te núu ducaⁿ na càda-ndo te cuu-ndo dàtná yúú vǎha dàcaa-güedé dava vehe, te cuu tucu-ndo dàtná cue dútú ñǎ xinu cuechi núú Yǎ Ndiǒxí ndéé sanaha, nàcuáa ñǎ túú ñǎ cumání-ndó núú-gǎ, chi nchaa cue téé-áⁿ ñǎ xóo cuáha ñaha-güedé sá ñǎ xóo nduu tǎhú-gǎ. Te nchòhó vitna tǎu-ndó càda-ndo nchaa nacuáa càháⁿ-gá, te nduu vétú iní-gá. Te ducaⁿ càda-ndo chi ndècu-ndo ndihì Xítohó Jesucrìstú. ⁶ Te Yá Ndiǒxí càchí-gá núú tütú-gá:

Yúhú taxi ndecu-í ìⁿ Yaá ñuú Sìon,

te cuu-gá dàtná ìⁿ yúú vǎha sá sánútnǎ-güedé xíquí cimièntú ìⁿ vehe, chi yúhú ní cachí-í sá Yáá-áⁿ ïo cunuu-gǎ.

Te nchaa ñáyiu quíndáá iní ñáhá xì-gá vá ìⁿ ndüu ndixi cuéchi iní-yu sá dúcáⁿ sàndáá iní ñáhǎ-yu xii-gá.

Duha càchí-gá núú tütú-gá. ⁷ Te nchòhó ñáyiu sàndáá iní ñáhá xì Xítohó Jesucrìstú ío cùu iní-ndó-gǎ, te nchaa ñáyiu ñǎ túú sàndáá iní ñáhá xì-gá quidé-yu dàtná càháⁿ-xi núú tütú Yǎ Ndiǒxí núú càchí-xi:

Yúú sǎ ñǎ dáquéé tǐhú cue téé dàcaa vehe, xǎⁿ cúú-xí yúú sǎ ïo-gá nándǎhì vitna.

Duha càchí-xi núú tütú-gá. Te yúú-ǎⁿ cada iní-ó sǎ cúú-xí Xítohó Jesucristú, chí ní dáquéé tǐhú ñáhá-güedě xii-gá. ⁸ Te càchí tucu-xi ìngá xichi núú tütú Yǎ Ndiǒxí:

Yúú-ǎⁿ nguñenu ñáyiú te ndùá-yu.

Duha càchí-xi núú tütú-gá. Te tnúhu-áⁿ quéé-xí sǎ ïo quide sǎá iní ñáyiú núú-gǎ, chí ñá túú cuìní-yu tñí-yu tnúhu càháⁿ-gá, te ducaⁿ tnàhí ndèé tnuní sá ncháá ñáyiú ñá túú cuìní tñí tnúhu càháⁿ-gá, te ïo cùu sǎá iní-yu núú-gǎ.

Ñáyiú ndècu ndìhi Yá Ndiǒxí

⁹ Te nchoo cùu-o ñáyiú sa ní dáquéé dǐⁿ ñaha Yá Ndiǒxí xii-o cuendá cundecu-o ndìhi-gá, te cùu-o dútú xínú cuèchi-o núú-gǎ, te mee-gǎ cúú-gǎ Yaá ïo cùnūu, te cùu-o ñáyiú quide ndáá xǐndecu ichi-gá te cùu tucu-o ñáyiú yǐndaha-gá. Te ducaⁿ ñǐ quide ñaha-gǎ xii-o cuendá sá cǔñaha-o xii nchaa ñáyiú sá ïo càhnu cuu-gá, te ïo vǎi núú sǎ vǎha quide-gá, te dǐu-gá ní quide ní dáñá-ó ncháa ichi cuehé ichi duha ndècu-o ní cuu, te ní sanu ichi ñaha-gǎ xii-o ñⁿ ichi váha, te vitna cùtnuní iní-ó sǎ ïo càhnu cuu-gá.

¹⁰ Te nchoo cùu-o ñáyiú ñá túú ndècu ndìhi Yá Ndiǒxí ní cùu, dico vitna ní ngúndecu ndìhi-o-gǎ, te dàvá-áⁿ vǎtá sàá-gá nduu càda váha ñaha-gǎ xii-o, dico vitna sa ní sǎá nduu quide váha ñaha-gǎ xii-o, chí ïo cùndahú iní ñáhá-gǎ.

Cada váha-o cùndecu-o cunu cuechi-o núú Yǎ Ndiǒxí

¹¹ Te nchòhó ïo cùu iní ñáhà-í xii-ndo, te càchí tnúhu-í xii-ndo sǎ nchóó cùu-o datná cue ñáyiú ndècu tnaduha ñⁿ ñuú, te ducaⁿ sǎtnahá-xi cùu-o chí

tnaa-ni ndècu-o ñuyíú-a, te sáá nduu ndùu táhú-ó cùndecu-o núú ndécú Yă Ndiǒxí táxí tnúní-gá, te xiǎⁿ càháⁿ ndàhú-í núú-ndó sǎ vǎ cádá-ndó nì ìⁿ sá cuèhé sá dúhá sàni iní-ndó, chi nchaa xiǎⁿ ñá túú cùu-xi sá vǎha sá cúú-xí-ndó. ¹² Te cada váha-ndo cùndecu-ndo núú nchàa ñáyíu ñá túú ndècu ichi Yá Ndiǒxí, te cuèi na càháⁿ ñáyíu sá nchòhó nchìcúⁿ ni-hnu-ndo ìchi cuehé ichi duha, dico quiní-yu nchaa sá vǎha quìde-ndo, dico na sàá nduu dāndixi túu Yá Ndiǒxí iní-yu sá ñà túú quìde váha-yu ndécú-yu, te dàvá-áⁿ cachí-yu sá quidé vǎha-ndo ndècu-ndo, te cada càhnú-yu Yá Ndiǒxí.

¹³ Te Xítóhó Jesucrístú cuíní-gá sá nchòhó ío quíndáá iní-ndó nchàa cue téé cùchiuⁿ taxi tnuní ñáhá xii-ndo, te ducaⁿ-ni quíndáá iní-ndó cuèi mee téé cùnuu vihi-gá yíndàha ñaha xii ñáyíu.

¹⁴ Te ducaⁿ-ni quíndáá iní-ndó nchàa dava-gá cue téé cùnuu, chi Yá Ndiǒxí ducaⁿ ñí cachí-gá cunduu sá cuè téé-áⁿ cada ndáá-güedé nchaa cuèchi ñáyíu quìde cuehé quidé dùha ndecu, te cáháⁿ váha-güedé cuèndá nchaa ñáyíu xíquide váha ndècu. ¹⁵ Te Yá Ndiǒxí cuíní-gá sá cádá vǎha-ndo cùndecu-ndo cuendá nchaa ñáyíu ío nìi dǐquí-xi càháⁿ cuèhé cuèndá-ndó sǎ ndécú-ndó ìchi Yá Ndiǒxí vá ñihí-gá-yu tnúhu cáháⁿ-yu.

¹⁶ Te nchòhó, Yá Ndiǒxí ní quide-gá sá cúú-ndó ñáyíu cuu cada nàcuáa véxi iní mée-xí, dico ñá díú sǎ dúcáⁿ ñí quide ñaha-gǎ xii-ndo, te ngóo-ndo càni iní-ndó càda-ndo nándí sá cuèhé sá dúhá, chi cada-ndo sǎ cúú-ndó ñáyíu xínu cuechi núú Yă Ndiǒxí. ¹⁷ Te canehe-ndo sǎ yíñùhu núú nchàa ñáyíu, ndìhi núú téé cùnuu vihi yíndaha ñaha xií-yu,

te cuu iní tnáhá ndì mee-ndo nacuaá ndècu-ndo ichi Yá Ndiöxí, te ío canehe-ndo sã yíñùhu núú-gã.

Nchaa nàcuáa ndoho-o cùndecu-o ichi Xítóhó Jesucristú

¹⁸ Te nchaa nchòhó ñáyiú xínu cuechi canehe-ndo sã yíñùhu núú cuè patróon-ndó, te quindáá iní-ndó càda-ndo nchaa chiuⁿ tahu-güedé. Te ñⁿ-ni càda-ndo núú cuè téé váha iní-xi, ndihí núú cuè téé ío cuihna iní-xi. ¹⁹ Te núú nchòhó ná càda ndee iní-ndó ndòho-ndo nchaa sã ñà túú tàú-ndó ndòho-ndo cuendá sã cuiní-ndó cùndáá-ndó núú Yá Ndiöxí ñà, te ío nduu vétú iní-gã. ²⁰ Te núú nchòhó ní quide-ndo ñⁿ cuéchi, te sàhni iní-ndó dàndoho ñaha ñáyiú xii-ndo, ¿te ná sã vãha cùu xíãⁿ-i? Dico núú nchòhó ná cádá ndèe iní-ndó ndòho-ndo nchaa sã cádá ñàha ñáyiú xii-ndo sã cuendá sã quidé-ndó sã vãha ñà, te núú ducaⁿ na càda-ndo te cùu-xi ñⁿ sã vãha núú Yá Ndiöxí. ²¹ Te Yá Ndiöxí ní cachí-gã sã cádá ndèe iní-ó ndòho-o nándi ndoho-o sã cuendá sã quidé-ó sã vãha, chi ío ní ndoho Xítóhó Jesucristú cuendá-ó, te ducaⁿ tàú-ó cànchicúⁿ nihnu-o càda ndee iní-ó ndòho-o nándi ndoho-o, chi ducaⁿ ñí quide-gã. ²² Te mee-gã ñà túú quide-gã ni ñⁿ sã cuèhé sã dúhá, te ni ñⁿ tnúhu ndehnde ñà túú càháⁿ-gã. ²³ Te òré ní xóo cúcuèhé ñáhá-güedé xii-gã, te ñà túú ní xóo danchòcáva-gã tnúhu cuèhé, te òré ní xóo dandòho ñaha-güedé xii-gã, te ñà túú ní xãhaⁿ-gã xii-güedé sã ío ná cada ñaha-gã, chi núú ndáhá Yá Ndiöxí ní xóo nachihí-gã méé-gã, ndihí nchaa sã sání iní-güedé cada ñaha-güedé xii-gã. Te Yá Ndiöxí cúú-gã Yaá ío váha cada ndáá cuéchi nchaa ñáyiú na sáá nduu. ²⁴ Te Xítóhó Jesucristú cúú-gã Yaá ní

xíhí núú cùrúxí cuendá nchaa cuéchi nchoo ñăyiu ndècu ñuyíú-a. Te ducaⁿ ñí xíhí-gá cuendá nchoo dùuⁿ duuⁿ dañ-a-o nchaa ichi cuehé ichi duha, te cada ndáá-ó cundecu-o ichi-gá. Te ní dánícuéhé ñáhá-güedě xii-gá, te sá dúcáⁿ ñí ndoho-gá xíáⁿ ní ngúndecu váha nchoo vitna. ²⁵ Te nchoo cùu-o datná cue mběé cue quiti ní xíta ni cùu, dico vitna ní tuha-o Xítohó Jesucrístú, te Yaá-áⁿ cúú-gă dàtná ìⁿ toli xìto ñaha-gá xii-o vitna cuendá sá vă cuíta nihnu-o.

3

Nàcuáa tàú ñáyiu tnăndaha cadá-yu cundecú-yu

¹ Te nchaa nchòhó ñáyiu dîhí ní tñandaha ío quindáá iní-ndó yî-ndo cuendá sá nùu ñá túú sândáá iní-güedé tnúhu Yá Ndiöxí te quindáá iní-güedé cuendá sá ndéhé-güedě quidé ndáá-ndó ndècu-ndo, te ni ñà túú xini ñuhu-xi cáháⁿ-ndó tnúhu-gá núú-güedě. ² Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yîñuhu núú Yă Ndiöxí. ³ Te vá cání iní-ndó mēe-ni cunduu vii-ndo, te ndada-ndo dîquí-ndó nàcuáa tàú-xi cunduu, te vá cání iní-ndó năndi canehe-ndo, te ni vă cání iní-ndó cuhnu-ndo mee-ni dóó văha sá ío vii ndáa. ⁴ Chi iní-ndó xini ñuhu-xi cunduu vii cunduu váha-xi núú Yă Ndiöxí cuéi vitna te cuéi núú cuăháⁿ núú vëxi, te cuu-ndo ñăyiu ío càhnu iní-xi, te núu ducaⁿ na càda-ndo te ío cuu váha iní Yă Ndiöxí. ⁵ Te ducaⁿ ío vii ío váha ní xínduu iní nchaa ñáyiu dîhí ní xíndecu ndéé sanaha, te ñáyiu-áⁿ ío ní sândáá iní-yu Yá Ndiöxí te ní cudíú-yu núú-gă, te ní tñí-yu nchaa tnúhu ní

cáháⁿ yíⁱ-yu. ⁶ Te ducaⁿ ñí xóo cada ndíi Sără ní xóo quíndáá iní ndíi yíⁱ ndíi, ndíi Àbrahám, te ní cánehe ndíi ðíhí-áⁿ sǎ yíⁱñùhu núú yíⁱ ndíi. Te núu nchòhó quídé vǎha-ndo ndècu-ndo te ñá túú yùhú-ndó ñǎ cada ñaha tnàha ñáyiu-ndo xii-ndo, te núu ducaⁿ quíde vǎha-ndo ndècu-ndo te quíde-ndo datná ní quíde ndíi Sără.

⁷ Te nchòhó cue tée ndècu ñadihí-xi ío vǎha cuáha-ndo cuendá nàcuáa cundecu vǎha-ndo ndíhí-yu, te ío vii cáháⁿ ndíhi-ndǒ-yu, chi ñáyiu-áⁿ íí-gǎ-yu dàcúxí nchòo cue tée, te ducaⁿ càda-ndo chí ndí ndúú-ndó ndúu táhú-ndó cundecu-ndo ndíhi Yá Ndiǒxí, te núu ducaⁿ na càda-ndo te òré cáháⁿ ndíhi-ndo Yǎ Ndiǒxí te tedóho ñaha-gǎ xii-ndo.

Ñáyiu quíde sá vǎha ndòhó-yu

⁸ Te càchí tnúhu tucu-í xii-ndo sǎ ïo cuu ñⁿnuu-ndo cundecu-ndo, te cundàhú iní tnáhá-ndó ñⁿ ñⁿ-ndo, te cuu iní tnáhá tùcu-ndo nacuáa ndècu-ndo ichi Yá Ndiǒxí, te cuu-ndo ñáyiu ndàhú iní-xi. ⁹ Te núu ñⁿ sá ñà túú vǎha quíde ñaha ñáyiu xii-ndo, te ñá díú-ní dùcaⁿ nanchocáva-ndo càda-ndó-yu, àdi xícuèhé ñáhǎ-yu xii-ndo, te vǎ ná dàncocáva-ndo ðíu-ni tnúhu cuèhé, chi cǎcáⁿ táhú-ndó núú Yǎ Ndiǒxí cuendá sá ná cǎdá vǎha ñaha-gǎ xii-yu, te ducaⁿ càda-ndo chí Yá Ndiǒxí ní cáháⁿ ñáhá-gǎ xii-ndo cuendá sá cǎdá vǎha ñaha-gǎ xii-ndo tnáhá-ndó. ¹⁰ Te núú tùtú Yǎ Ndiǒxí càchí-xi:

Nchaa ñáyiu cuení cundecu vǎha ndí nchàa nduu
nini cundecú-yu ñuyíú-a,

xìni ñuhu-xi sá vǎ cǎháⁿ-yu tnúhu cùtexínu, te ni vǎ dǎcuàndehndé-yu.

11 Te xìni ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni sǎ vǎha, te ío ndùcú-yu nàcuáa cadá-yu cundecu váha-yu ndihì tnàha ñáyíu-yu te ñi-u-ni ducaⁿ cànchicúⁿ nihnú-yu cadá-yu.

12 Te Yá Ndiöxí xító-gǎ nchaa ñáyíu quide ndáá núú-gǎ

te tedóho-gǎ nchaa tnúhu cǎháⁿ-yu,

dico nchaa ñáyíu ñá túú cuìní cada ndáá, ñáyíu-áⁿ ñà túú cùu váha iní-gǎ núú-yu.

Duha cǎchí-xi núú tütú-gǎ.

13 Te vá yǒo níhí ndéé càda ñaha xii-o ìⁿ sá ñà túú vǎha te núu mee-ni sǎ vǎha na càda-o cundecu-o. 14 Àdi núu ná cúú sǎ ná cǎdá ñaha ñáyíu xii-o sǎ cuendá sá quidé vǎha-o ndècu-o ña, te sá dúcáⁿ ná cǎdá ñáhá-yu xii-o cùu-xi ìⁿ sá vǎha sá cúú-xí-ó núú Yá Ndiöxí. Te na cǎchí tnúhu-í xii-ndo sǎ vǎ yùhú-ndǒ-yu, te ni vǎ cùndíyí-ndó cuendá nchaa sá ná càda ñahá-yu xii-ndo. 15 Te nèhe-ndo sá yíñùhu núú Xítohó Jesucrístú. Te ío cundecu túha-ndo dǎnehé-ndó ñáyíu véxi ndùcu tnúhu núú-ndó nàcuáa ndùu tnúhu ndee ìní ní taxi Xítohó Jesucrístú ndécú ndihì-ndo, te cuu vii cuu váha iní-ndó cǎháⁿ ndihì-ndǒ-yu, te cǎháⁿ-ndó núú-yu mee-ni tnúhu yíñùhu nacuáa cùu váha iní Yá Ndiöxí. 16 Te ío cada váha-ndo cùndecu-ndo cuendá sá vǎ cùndíyí-ndó, te núu ducaⁿ na càda-ndo, te nchaa ñáyíu xǐcuèhé ñáhá xii-ndo cuendá sá quidé vǎha-ndo ndècu-ndo ichi Xítohó Jesucrístú quendóo canúú-yu ndihì nchaa tnúhu cǎháⁿ-yu, chi

nchòhó quidé vǎha-ndo ndècu-ndo. ¹⁷ Te váha-gá sá ndóhó-ó cuèndá sá quidé-ó sǎ vǎha te núu mee Yǎ Ndiǒxí ducaⁿ cuìní-gá cunduu, te ñá díú sǎ ndóhó-ó cuèndá sá ñà túú quide-o sá vǎha.

¹⁸ Te Xítóhó Jesucrístú ní xíhí-gá sá cuèndá nchaa cuéchi nchaa nchoo ñǎyiu ndècu ñuyíú-a, te #ⁿ xito-ni ducaⁿ ñí xíhí-gá te ducaⁿ te vá cùú tnàhí-gá, te mee-gǎ cúú-gǎ Yaá ñá túú tnàhí cuéchi-xi, te ducaⁿ ñí ndoho-gá cuèndá nchaa cuéchi ñáyiu ndècu ñuyíú-a ñáyiu ñá túú cuìní cada ndáá núú Yǎ Ndiǒxí, te ducaⁿ ñí cuu cuèndá sá núcũndecu váha-yu núú Yǎ Ndiǒxí te núu na quèndáá iní ñáhǎ-yu xii-gá. Te mee-gǎ ní xíhí-gá dico Espíritú-gá chi ní xíndecu-ni-xi, ¹⁹ te Espíritú-gá ní sáháⁿ-xi ní cǎháⁿ-xi tnúhu Yá Ndiǒxí núú nchaa espíritú ñáyiu ndècu núú ùhú núú ndàhú. ²⁰ Te ñáyiu-áⁿ cúú ñáyiu ní xíndecu ndéé sanaha cǔtnàhá ní xíndecu ndíi Nǒé, chi ñáyiu-áⁿ ïo ní quide sàá iní-yu núú Yǎ Ndiǒxí. Te Yá Ndiǒxí ïo váha iní-gá, chi ní dácácá-gǎ nduu ñí xíndecuu ndíi Nǒé ní cadúha ndíi bàrcú cuèndá ndétú-gǎ ndixi cuéchi iní-yu sá ñà túú quide váha-yu ndècú-yu ni cùu. Te dàvá-áⁿ ñí ndaa ndute ñuyíú te ní cácu úná duha ná tnàhá ñáyiu, chi ní quée-yu xití bàrcú-áⁿ, te ñá túú ní cǎhá-yu. ²¹ Te sá dúcáⁿ ñí cácu ñáyiu úná-áⁿ ñà túú ní cǎhá-yu ndute ní ndaa ñuyíú dàvá-áⁿ. Te xǎⁿ quée-xí sǎ cuándute ñáyiu vitna, te naníhí tǎhú-yu te núu na quèndáá iní-yu tnúhu ndáá tnúhu Yá Ndiǒxí. Te ñá díú sǎ cuándute-o te nduu ndoo nduu nine yiqui cùñú-ó te naníhí tǎhú-ó, chi xìni ñuhu-xi nǎhmá-ó núú Yǎ Ndiǒxí nchaa yíca cuéchi-o, te nduu ndoo nduu nine iní-ó,

te ducaⁿ te naníhí tàhú-ó, chi Xítohó Jesucrìstú ní xíhí-gá cuendá-ó te ní ndoto-gá. ²² Te Yaá-áⁿ cuãndaa-gá andiu, te ní ngóo-gá xio cùha Yá Ndiöxí, te tàxi tnuní-gá nchaa espíritú cúnùu ndìhi nchaa dava-gá cue espíritú xínú cuèchi.

4

Cada-o nàcuáa cuini méé Yă Ndiöxí

¹ Te Xítohó Jesucrìstú ní ndoho-gá cútnàhá ní xíndecu-gá ñuyíu-a, te vitna nchòhó cundecu túha-ndo ndòho-ndo cuendá-gá, chi nchaa ñáyiú ndòho nándi sá ndóhó cuendá-gá dàñá-yu nchaa sá cuèhé sá dúhá. ² Te ducaⁿ ñà túú-gă ndécü-yu ichi cuèhé ichi duha, chi mee-nă nàcuáa càháⁿ Yă Ndiöxí quidě-yu ndècú-yu ñuyíu-a. ³ Te nchòhó sa nàha-ndo sá ïo cuèhé núú să cuèhé sá dúhá nĩ xóo cada-o cùtnàhá vátá cùndecu-gá-ó ichi Yá Ndiöxí, chi ní xóo cada-o nchàa sá cuèhé sá dúhá cùdíí ìní nchaa ñáyiú ñá túú sàndáá iní tnúhu-gá, te dàvá-áⁿ nĩ xóo cada-o nchàa núú să cuèhé sá dúhá, te ní xóo cani cuèhé ní xóo cani duha iní-ó, te ní cuu-o cuè ñáyiú quihu, te ní xóo cundecu-o víco núú nĩ xóo cada-o nchàa sá ñà túú văha, te ní xóo níhí tnáhá-ó ndìhi nchaa tnaha quihu-o, te ní xóo chiñuhu-o nchàa sá càchí-yu cùu ndióxí te ñá ndáá sá ndiöxí cúú nchàa xiăⁿ, te nándi-gá nchaa sá cuèhé sá dúhá nĩ xóo cada-o dàvá-áⁿ. ⁴ Te ñáyiú-áⁿ cùññuhu-yu vitna sá ñà túú-gă nihí tnáhá-ó ndìhí-yu cada-o nchàa sá cuèhé sá dúhá quidě-yu, te xiăⁿ càháⁿ cuèhé-yu cuendá-ó vitna. ⁵ Dico sáá nduu te ñáyiú-áⁿ năhmá-yu nchaa sá quidě-yu núú Xítohó Jesucrìstú, chi diu-gá sa ndècu túha-gá sá cádá ndăá-gá cuèchi nchaa ñáyiú sa ní xíhí, ndìhi

cuéchi nchaa ñáyiú xĩndecu vívú. ⁶ Te cue ñáyiú sa ní xíhí ní xĩndedóho tnúhu Xítóhó Jesucrístú, te cuéi ní xíhí-yu dàtná xíhí dava-gá ñáyiú, dico espíritú-yu chí ní nduu táhú-xi ndècu váha-xi dàtná ndécú Yá Ndiöxí.

⁷ Te vitna ta cùyatni danaa Yá Ndiöxí ñuyíú-a núu xíáⁿ ío váha cuáha-ndo cuèndá nàcuáa cun-decu-ndo, te cáháⁿ ndìhi-ndo-gă. ⁸ Te xìni ñuhu-xi sá ïo cuu iní tnáhá-ndó ìⁿ ìⁿ-ndo, chí núu ducaⁿ na cùu iní tnáhá-ndó ìⁿ ìⁿ-ndo, te vá cání-gă iní-ndó càda cuendá-ndó nchàa sá ñà túú vâha quide ñaha ñáyiú xii-ndo, ⁹ te nchòhó ñáyiú xĩndecu vehe-xi cuáha nùu-ndo vehe xii cue ñáyiú ñuhu ichi na ndetatú-yu, te ío váha cuu iní-ndó dùcaⁿ cada-ndo.

¹⁰ Te Yá Ndiöxí ní taxi-gá ndí dííⁿ núú táhú ndécú ndìhi-ndo ìⁿ ìⁿ-ndo, te nàcuáa ndùu táhú ní nduu táhú-ndó ìⁿ ìⁿ-ndo te ducaⁿ chĩndee tnaha-ndo, te vá dáñá ndèé-ndó càda-ndo nchaa nacuáa tàuchiuⁿ Yá Ndiöxí cada-ndo, te chĩndee ñàha-gá xii-ndo.

¹¹ Te dava nchòhó ñáyiú càháⁿ tnúhu Yá Ndiöxí núú ñáyiú, xìni ñuhu-xi cáháⁿ-ndó nàcuáa ndùu tnúhu-gá núú-yu, te dava nchòhó ñáyiú quide nchaa núú chiuⁿ chĩndee tnaha ñáyiú-xi, xìni ñuhu-xi cada-ndo sá Yá Ndiöxí chĩndèe ñaha-gá xii-ndo, te ducaⁿ càda-ndo nchaa núú sã vâha, chí Xítóhó Jesucrístú tnáhá-gá chĩndèe ñaha-gá xii-ndo, te ducaⁿ ïo cuu càhnu Yá Ndiöxí. Te vitna tàú-ó càháⁿ-ó sã ïo càhnu cuu Xítóhó Jesucrístú, chí ñu-gá cúnùu-gá nchaa nduu nchaa quíú, te ducaⁿ na cùnduu.

Ndoho tnahá-ó cùndecu-o ichi Xítóhó Jesucrístú

12 Te nchòhó ñáyiú ío cùu iní-í, vá cùñũhu-ndo sǎ ïo ndòho-ndo ndecu-ndo ichi Xítóhó Jesucristú, chi sá dúcáⁿ ndòho-ndo-áⁿ cùtnùní ndisa sá sàndáá iní-ndó-gǎ, te vá cání ìní-ndó nǎ cuèndá ducaⁿ ndòho-ndo. 13 Chi da cudíí ìní-ndó te núu ndòho-ndo datná ní ndoho Xítóhó Jesucristú, te ducaⁿ sũúní cùdíí ìní-ndó òré ná quèxi tucu-gá ñyúíú-a te dàvá-áⁿ quíní-ndó sǎ ïo càhnu cuu-gá. 14 Te núu xǐcuèhé ñáhá ñáyiú ndècu ichi cuehé ichi duha xii-ndo cuèndá sá ndécú-ndó ìchi Xítóhó Jesucristú, te xiǎⁿ cúú-xí ìⁿ sá vǎha sá cúú-xí-ndó nũú-gǎ, te ducaⁿ chi Espíritú Yǎ Ndiǒxí sá ïo cùnuu ndecu ndíhi ñaha-xi xii-ndo, te nchaa ñáyiú ndècu ichi cuehé ichi duha-ǎⁿ càháⁿ cuèhé-yu cuèndá Xítóhó Jesucristú, dico nchòhó càchí-ndó sǎ ïo càhnu cuu-gá. 15-16 Te núu nchòhó dándòho ñaha ñáyiú xii-ndo sǎ cuèndá sá ndécú-ndó ìchi Xítóhó Jesucristú ñǎ, te vá cúú càháⁿ núú-ndó, chi ndacáⁿ táhú-ndó nũú Yǎ Ndiǒxí cuèndá sá ndécú-ndó ìchi-gá. Te cuèí ndòho-ndo ndecu-ndo, dico ñǎ túú cùu-ndo ñáyiú sàhni ndíyi te ni ñà túú cùu-ndo ñáyiú dùhu, te ni ñà túú cùu-ndo ñáyiú quède cuehé quidé dùha, te ni ñà túú cùu-ndo ñáyiú chindee tnúhu tnàha ñáyiú-xi ìⁿ sá ñà túú tàú-ndó càda-ndo.

17 Te vitna sa quèsaha Yá Ndiǒxí cada ndáá-gá nchaa sá quidé nchòo ñáyiú ndècu ndíhi-gá, te núu ducaⁿ te ndéé-gá cada-gá nchaa ñáyiú ñǎ túú sàndáá iní ñáhá xì-gá òré ná sàá nduu dùcaⁿ cada ñaha-gá xií-yu. 18 Te nchòhó xìní-ndó sǎ ñáyiú quède váha ndècu ichi Xítóhó Jesucristú ndòho tnahá-yu ndécú-yu, dico sáá nduu te nduu táhũ-yu cundecú-yu ndíhi-gá. Te núu ducaⁿ ndòho nchaa ñáyiú quède váha ña, ¿te nása-gá yáha nchaa ñáyiú

ndècu ichi cuehé ichi duha na sàá nduu càda ndáá Yă Ndiǒxí cuéchi-yu-i? ¹⁹ Te nchaa nchòhó ñáyi ndòho nacuáa cuíní Yă Ndiǒxí xìní ñuhu-xi sá vă dáñá ndéé-ndó càda váha-ndo cùndecu-ndo, te ío quíndáá iní-ndó să xító ñàha-gá xii-ndo. Te ñu-gá cúú-gă Yaá ní cadúha ñaha xì-o, te quíde-gá ñí sá càháⁿ-gá.

5

Nàcuáa tàú-xi cada ñáyi ndècu ichi Xítóhó Jesucristú

¹ Te yúhú càháⁿ-í dóho nchaa nchòhó cue téé yíndaha nchaa dava-gá ñáyi ndècu ichi Xítóhó Jesucristú, chi tnàhá yúhú yíndàha-í ñáyi ndècu ichi-gá, te sàndáá iní-í tnúhu-gá, te ní xiní-í nchaa nàcuáa ní ndoho-gá, te sáá nduu te tnàhá-í cunuu-í ndìhi-gá. ² Te ío canehe cuèndá-ndó nchàa ñáyi ndècu ichi Yă Ndiǒxí yíndàha-ndo te cada-ndo dàtná quíde cuè toli, chi cue téé-áⁿ ño váha xító-güedé mbéé-güedé. Te canehe cuèndá-ndó-yu sá cúú ñí méé-ndó te ñá díú să ío ñí ñáyi cada yica ñàha xii-ndo, te ni ñà díú să cuíní-ndó cùhuⁿ yáhu-ndo, chi ni yùhu ni iní-ndó còto-ndó-yu, chi ducaⁿ cuíní Yă Ndiǒxí cunduu. ³ Te vá cadá-ndó să ño cùnuu-ndo núu-yu, chi cada-ndo mée-ni sá váha cuèndá ducaⁿ cànchicúⁿ nihnú-yu cadá-yu tnàhá-yu. ⁴ Te òré ná quíxí tùcu Xítóhó Jesucristú Yaá néhé cuèndá ñáhá xì-o nchaa-o ñuyíú-a, te taxi-gá sá ño váha nduu táhú-ó, te cunuu-o ndìhi-gá ni caa ni quíhíⁿ.

⁵ Te nchòhó ñáyi ndècu ichi Xítóhó Jesucristú càháⁿ-í dóho-ndo să ño quíndáá iní-ndó cuè téé

yìndaha ñaha xii-ndo nacuaa ndècu-ndo ichi-gá,
 te nchaa-ndo tàú-ndó quìndáá iní tnáhá-ndó ìⁿ
 ìⁿ-ndo, chi núú tütú Yă Ndiöxí cächí-xi ìⁿ xichi:
 Nchaa ñăyiu quide cahnu mee-xi ñá túú cùu váha
 iní Yă Ndiöxí núŷ-yu,
 dico nchaa ñăyiu ndàhú iní-xi te chìndee ñaha-gá
 xíi-yu.

Duha cächí-xi núú tütú-gá. ⁶ Te dañà-ndo mèe-ndo
 núú ndáhá Yă Ndiöxí, chi mee-gă ío cùnūu-gá. Te
 núú ducaⁿ na càda-ndo, te sáá nduu te cada nínu
 ñaha-gă xii-ndo. ⁷ Te nchaa sá yăha-ndo ndècu-ndo
 te nachihi-ndo ndàha Yă Ndiöxí, chi mee-gă xító
 ñaha-gá xii-ndo.

⁸ Te ío váha cuáha-ndo cuèndá cundecu-ndo,
 te quíi iní-ndó chi sácúíhná xícá cùu-xi cuíní-xi
 dacuíta nihnu ñaha-xi xii-o, chi ío cùu úhú iní
 ñáhá-xí, te cùu-xi datná ìⁿ quítí dééⁿ xícá ndùcu sá
 cáxí-xí. ⁹ Te ío quìndáá iní-ndó Xítóhó Jesucrístú,
 te vá dáñá-ndó mèe-ndo dandahú ñáhá sácúíhná
 xii-ndo càda-ndo nacuaa cuíní-xi, chi ñaha-ndo sá
 ncháá ñăyiu ndècu ichi Xítóhó Jesucrístú xìndecu
 nihíi ñuyíú ndóhō-yu dàtná ndóhó nchòo ndecu-o
 ichi-gá. ¹⁰ Dico sacú-ni nduu duha cundoho-o te
 dātnùní ñá túú-gă ná cumání-ó cùndecu-o núú Yă
 Ndiöxí, te dàvá-áⁿ vă cání ìⁿ caní úú iní-ó cùndecu-o
 ichi-gá. Te ío-gá ngúndecu ndihí-o tnūhu ndee
 iní cada-o nchàa nacuaa cāháⁿ-gá, te ducaⁿ càda-o
 chi mee Yă Ndiöxí ío chindee ñaha-gá xii-o, te
 dīu-ni Yaá-ăⁿ ío cùu iní ñáhá-gă xii-o, chi ní cáháⁿ
 ñáhá-gă xii-o cùndecu-o núú ío váha càa ndecu-gá
 cundecu-o nì caa nì quíhíⁿ, te ducaⁿ nì quide-gá
 chi ní sándáá iní-ó Xítóhó Jesucrístú. ¹¹ Te ío
 ndacáⁿ táhú-ó núú Yă Ndiöxí chi ío cāhnu cuu-gá,

te cùnuu-gá nchaa nduu nchaa quíú. Te ducaⁿ na cùnduu.

Tnúhu ndéé núú nǐ ndihi-ná

¹² Te té Silvanú xìní-í sá cúú-dě ìⁿ téé quìde ndáá ndécú ìchi Xítóhó Jesucristú, te diu-dé ní cáháⁿ ndàhú-í núú-dě ní tee-dé ìⁿ ǔú tnúhu sá nǐ xáhaⁿ-í xii-dé núú tütú-a cuèndá daquìxi-í ndaha-ndo, te núú tütú-a cächí tnúhu ndáá-í xii-ndo sǎ Yǎ Ndiǒxí ío cùu iní ñáhá-gǎ, te chìndee ñaha-gá xii-ndo ndècu-ndo, te cächí tnúhu tucu-í xii-ndo sǎ ïo quíndáá iní-ndó sǎ ndáá ducaⁿ quìde ñaha-gá xii-ndo.

¹³ Te cue ñáyiú ndècu ñuú Babiloniá, ñáyiú ndècu ichi Yá Ndiǒxí, diu-ni ñáyiú ní cachí Yǎ Ndiǒxí sá nánìhí tàhú dàtná cúú nchòhó, ío quìde ndee iní ñáhǎ-yu xii-ndo, te tnàhá té Mǎcú téé cùu datná ìⁿ déhe-í quíde ndèe iní ñáhá-dě xii-ndo. ¹⁴ Te ndihi tnúhu yiñùhu cada ndee iní tnáhá-ndó ìⁿ ìⁿ-ndo, te xìcáⁿ táhù-í núú Yǎ Ndiǒxí sá ïo na cùndecu nahì nchaa nchohó ñáyiú ndècu ndihi Xítóhó Jesucristú. Te ducaⁿ na cùnduu. Te ío chí cádá ndèe iní-nǎ vítna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939